

Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat (Atuartitsinerup imai, aaqqissugaanera, piareersarneqarnera, atuartut amerlassusaat, isumassuinikkut attaveqarfissaq aamma atuarfimmi pisortatut ilinniartitaaneq pillugu malittarisassat allanngortinneri)

§ 1

Atuarfik pillugu Inatsisartut inatsisaanni nr. 15, 3. december 2012-imeersumi, Inatsisartut inatsisaatigut nr. 21, 13. november 2017-imi allanngortinneqartumi, tulluuttut allannguutigittinneqassapput:

1. § 6 imatut oqaasertalerneqassaaq:

" § 6. Klassimi ataatsimi atuartut amerlassusiisa ukiup atuarfusup aallartinnerani 26-t qaangissanngilaat, taamaattorli takuuk imm. 2.

Imm. 2. Naalakkersuisut malittarisassanik aalajangersaasinnaapput klassimi atuaqatigiit amerlanerpaaffissaannik ikilisitsisinnaaneq pillugu, atuartut ilinniartinneqarnerisa atugarissaarnissaasalu tamanna pisariaqartippagu."

2. § 10, imm. 1, nr. 2, § 11, imm. 2, nr. 2, § 12, imm. 1, nr. 2, aamma § 13, imm. 1, nr. 2, imatut oqaasertalerneqassaaq:

"2) kulturimik inuiaqatigiinnillu sammisaqarnermut ilaapput inuiaqatigiilerineq, oqaluttuarisaaneq kiisalu upperisalerineq isumalioqqissaarnerlu."

3. § 10, imm. 1, nr. 5 ima oqaasertalerneqassaaq:

"5) mernguernartulerinerup iluaniipput atuartitsissutit angerlarsimaffimmi suliaassanik ilinniarneq, timersorneq, tassani ilaallutik silami sammisaqartarneq, nipilersorneq tassani ilaallutik erinarsorneq, aalaneq isiginnaartitsineq, eqqumiitsuliorneq tassani ilaallutik illuliortaaseq aamma assessorluni suliaassat ilusilersuinerlu, tassani ilaallutik sananeq aamma assassorneq."

4. § 10, imm. 3, imatut oqaasertalerneqassaaq:

" Imm. 3. Atuartitsissutini tamani aamma atuartitsissutini qanitariissuni tamani qarasaasialerineq,

tassanilu ilaallutik teknologiimik paasinninneq, atortorissarutiniq digitaliusunik atuineri ileqqorinnissaq aamma attaveqaatinik digitaliusunik atuineq atuartsinerup ilaatut atuartsinermilu atortutut ilaatinneqassaaq.”

5. I § 10-mi imm. 3-p kingorna immikkoortumik nutaatut ilanngunneqassaaq:

” Imm. 4. Mernguernartulerinerup iluani kulturimut aamma inooqatigiinnermut tunngasumik ingerlatat atuartsinermi ilanngunneqarsinnaapput.”

Imm. 4-7 tamatuma kingorna tassaalissapput 5-8.

6. § 11, imm. 2, nr. 5, imatut oqaasertalerneqassaaq:

”5) mernguernartulerineq tassunga ilaallutik eqqumiitsuliorneq, timersorneq kiisalu atuartsissutit akimorlugit nipilersornermi aamma assassornermi ilusilersuinermilu ingerlatsinerit.”

7. § 12, imm. 1, nr. 5, imatut oqaasertalerneqassaaq:

”5) mernguernartulerineq tassunga ilaallutik eqqumiitsuliorneq, timersorneq, assassorluni suliasat ilusilersuinerlu, angerlarsimaffimmi suliasanik ilinniarneq aamma nipilersorneq.”

8. § 12-imi imm. 2-p kingorna nutaatut ilanngunneqassaaq:

” Imm. 3. Sammisani assessorissani sananermi aamma assassornermi aamma nipilersornermi sammisani erinarsornermi, aalanermi aamma isiginnaartitsineri atuartsineq pikkorissarnertut imaluunniit atuartsissutit akimorlugit atuartsinertut aaqqissuunneqassaaq.”

Imm. 3 tamatuma kingorna tassaalissaaq imm. 4.

9. § 13, imm. 1, nr. 5, imatut oqaasertalerneqassaaq:

”5) mernguernartulerineri ilaapput atuartsissutit timersorneq aamma angerlarsimaffimmi suliasanik ilinniarneq.”

10. § 13, imm. 2-p kingorna nutaatut ilanngunneqassaaq:

” Imm. 3. Atuartsissutini qinigassatut eqqumiitsuliornerup, assassornerup ilusilersuinerullu, nipilersornerup teknologiimik paasinninnerup iluani sammisassat neqeroorutigineqarsinnaapput. Sumiiffimmi periarfissat mernguernartulerineri atuartsissutit qinigassatut neqeroorutigineqarsinnaapput.”

Imm. 3 matuma kingorna tassaalerpoq imm. 4.

11. § 14, imm. 2, oqaaseqatigiit siulliit imatut oqaasertalerneqassapput:

”Naalakkersuisut atuartsissutit siunertaannut § 10, imm. 1, nr. 1-3-mi pineqartunut atuartsissutissanut aamma § 10, imm. 1, nr. 4 aamma 5-imi qanitariissunut eqqaaneqartunut ilikkagassatut pilersaarutiniq suliaqassapput.”

12. Kapitali 7-imi qulequtaq imatut oqaasertalerneqassaaq:

"Ilinniartitsisut sulisullu allat"

13. § 35, imm. 4-mi, "§ 10, imm. 7" "§ 10, imm. 8"-mut allanngortinneqassaaq.

14. § 35-imi imm. 4-p kingorna nutaatut ilanngunneqassaaq:

" Imm. 5. Inuit isumassuinikkut attaveqarfissamik isumaginnittut, tak. § 38, imm. 1 nr. 5, isumaginninnermi siunnersortitut, perorsaasutut, ilinniartitsisutut, peqqissaasutut ilinniarsimassapput, imaluunniit suliamik isumaginninnissamut piukkunnaateqalersitsisumik ilinniartitaanikkut imaluunniit piginnaasaqarnikkut assingusunik suliamik ingerlatsisinnaajumallutik tunuliaqutaqassallutik."

Imm. 5 tamatuma kingorna tassaalissaaq imm. 6.

15. § 38, imm. 1-imi, nr. 4-p kingornagut nutaatut normuliunneqassaaq:

"5) atuarfinni tamani isumassuinikkut attaveqarfissanik pilersitsineq ingerlatsinerlu, atuarnermut toqqaannartumik attuumassuteqanngitsut ajornartorsiutit pillugit suliatigut, inulerinermilu piginnaasaqartumut inummut atuartoq ajornartorsiutit pillugit saaffiginnissinnaanngorlugu."

Nr. 5-6 tamatuma kingorna tassaalissapput nr. 6-7.

16. § 43, imm. 2, nr. 3, oqaaseqatigiit siulliit, "§ 10, imm. 7" "§ 10, imm. 8"-mut allanngortinneqassaaq.

17. § 43, imm. 3 imatut oqaasertalerneqassaaq:

" Imm. 3. § 10, imm. 1-imi atuartsissutini aamma atuartsissutini qanitariissuni eqqaaneqartuni atuarfiit ilikkagassatut pilersaarutaannut ilassutit atuarfiit siulersuisuinit ataasiakkaanit siunnersuutaasut tunngavigalugit kommunalbestyrelsimit akuerineqassapput, tak. § 47, imm. 9."

18. § 47, imm. 3-mi nr. 4 atorunnaarsinneqarpoq.

Nr. 5-12 taamaasillutik nr. 4-11-nngussapput.

19. § 47, imm. 9, imatut oqaasertalerneqassaaq:

" Imm. 9. Atuarfiup siulersuisui kommunalbestyrelsimut § 10, imm. 1-imi atuartsissutinut atuartsissutinullu qanitariissunut taaneqartunut ilassutitut ilikkagassatut pilersaarutitut siunnersuusiorsinnaavoq."

20. § 48, imm. 1 imatut oqaasertalerneqassaaq:

"Atuarfinni tamani pisortamik atorfinitsitsisoqassaaq taannalu atuarfimi allaffissornikkut perorsaanikkullu sulinermi aqutsisuusaaq aammalu atuarfiup ingerlatsinera pillugu atuarfiup siulersuisuinit kommunalbestyrelsimullu akisussaasuulluni."

21. § 48-p kingorna ilanngunneqassaaq:

" § 48 a. Atuarfiup pisortaatut suliaasaq isumagisinnaajumallugu pineqartoq atuarfimmi ilinniartitsisutut ilinniarnermik imaluunniit Naalakkersuisunit akuerineqartumik ilinniarnermik allamik naammassisaqarsimassaaq aamma kommunalbestyrelsit isumasioreerlugit Naalakkersuisunit aalajangersarneqartut malittarisassat naapertorlugit atuarfiup pisortaatut ilinniartitaanermik naammassisaqarsimassalluni, taamaattorli tak. imm. 2 aamma 3.

Imm. 2. Atuarfiup pisortaata piffissap atorfiniffiusup kingorna kingusinnerpaamik ukiut pingasut qaangiutsinnagit atuarfiup pisortaatut ilinniartitaanermi atuarfiup pisortaata naammassisaqarnissaa piumasaralugu atuarfiup pisortaatut ilinniartitaanermik naammassisaqarsimanngitsumik atuarfiup pisortassaanik kommunalbestyrelsi atorfinitsitsinnaavoq. Pisuni aalajangersimasumi, pissutsit immikkut ittut tamatumunnga pissutissaqartitsippata, atuarfiup pisortaatut ilinniartitaanerup naammassineqarsimanissaanut piffissaliussap ukiumik ataatsimik sivitsorneqarsinnaanera Naalakkersuisut akuerisinnaavaat.

Imm. 3. Kommunalbestyrelsi atuarfinni mikinerusuni atuartunik 95-inik ikinnerusunik atuortoqartuni atuarfiup pisortaatut ilinniartitaanermik naammassisaqarsimanngitsumik atuarfiup pisortassaanik atorfinitsitsinnaavoq, atuarfiup pisortaa

1) aqutsinikkut allanik piginnaasaqarpat, imaluunniit

2) piginnaanngorsarnernik Naalakkersuisunit aalajangersarneqarsimasunik ingerlataqassaaq."

22. § 53, imm. 2-mi, "§ 10. Imm. 5", "§ 10, imm. 6"-imut allanngortinneqassaaq.

23. § 53, imm. 3-mi, "§ 10. Imm. 5 aamma 6", "§ 10, imm. 6 aamma 7"-imut allanngortinneqassaaq.

24. § 53, imm. 5-imi, "§ 10, imm. 5, aamma 6", "§ 10, imm. 6 aamma 7"-imut allanngortinneqassaaq.

§ 2

Inatsisartut inatsisaanni § 1, nr. 1, 12, 14, 15 aamma 20, ullormi 1. januar 2022 atuutilissapput.

Imm. 2. Inatsisartut inatsisaanni § 1, nr. 2-11, 13, 16-19 aamma 22-24, ullormi 1. august 2023 atuutilissapput.

Imm. 3. Atuarfimmi pisortatut ilinniartitaaneq pillugu Inatsisartut inatsisaani § 1, nr. 21, ullormi 1. januar 2023 atuutilissaaq, atuarfimmilu atuarfiup pisortaatut ullormi 1. januar 2023 atorfinitsinneqartunut atuutissanani.

Namminersorlutik Oqartussat, ulloq 19. november 2021

Múte Bourup Egede
Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut